

Hoben di 17 aña cu a abusa di mucha homber di 7 aña

ORANJESTAD – Ayera mainta e hoben G. 17 a presenta den Corte acompaña pa su mama y abogado mr. Griffith. Tambe a presenta den Corte, mayornan di e mucha homber di 7 aña cu a bira victima di G.

HOHEN TA ABUSA DI MUCHA HOMBER

Fiscal a bisa Hues cu e acusacion contra G. ta cu entre Januari 2010 te September 2012, el a haci actonan immoral cu un mucha homber (7). El a penetra e mucha den su atras.

MAMA DI VICTIMA A DEMANDA 50 MIL FLORIN

Prome cu tratamento di e caso a cuminsa, Hues a puntra e mayornan di e mucha victima nan tin demanda di daño. E mama di e victima a bisa cu el a wordo informa

na warda di Polis Santa Cruz cu e por demanda no mas cu 50 mil florin. Hues a puntra e señora cuanto e ta desea di demanda. E señora, cu wowo na awa a bisa cu e ta demanda 50 mil di daño inmaterial. Tambe el a pidi Hues pa prohibi G. bin den cercania di su yiu.

VICTIMA TA BOU TRATAMENTO

Hues a bisa e mama cu e tin cu specifica su demanda. E mama, tabata basta rabia, y a remarca cu aki no ta cuestion di placa sino cu su yiu homber apenas a cuminsa biba y ta wordo molestia. E mama a splica cu su yiu homber awor ta siguiendo tratamento. El a bisa Hues cu tur anochi e mucha no por drumi bon. Segun e mama, psicologo cu ta tratando e mucha, a bisa cu actualmente no por avansa cu e tratamento door cu e mu-

cha ta masha depresivo. Hues a puntra e mama si e demanda ta encera e gastonan di tratamento. E mama a splica cu via Polis tin un psicologo ta atendiendo su yiu. El a enfatisa cu e demanda ta e parti inmaterial.

ABOGADO A PIDI PA POSPONE CASO

Ta asina cu e abogado mr. Griffith a pidi Hues pa pospone e caso door cu el a haya documentonan di e caso mucho laat. E ta haya cu e no a haya suficiente tempo pa defende e hoben sospechoso debidamente. Fiscal su reaccion riba esaki tabata cu e por compronde e punto di bista di abogado cu e kier defende su cliente debidamente. Sinembargo Fiscal a muestra cu ta na October e abogado a pone su mes pa defende e sospechoso. Fiscal a muestra cu e sospechoso mes a bisa cu ta un

biaha so el a mishi cu e mucha. Teniendo cuenta cu esaki y tambe cu e caso a sosode un tempo pasa, Fiscal ta haya cu lo por trata e caso di biaha. El a propone pa pospone e caso un rato pa abogado evalua e documentonan. Abogado mr. Griffith a remarca cu a tarda cu tratamento di e caso den Corte y e no ta mira pakico Fiscal tin pura awor cu tratamiento di e caso.

HUES A POSPONE E CASO

Hues a bisa cu e ta bay evalua un rato y lo duna su decision di biaha. Despues di un rato Hues a bolbe den sala di Corte y a duna di conoce su decision. Hues ta haya cu ta trata aki di un caso serio y cu mester e preparacion debido. Esey ta nifica cu e ta honra e peticion di abogado. Hues a bisa cu e kier pospone e caso pero no pa un periodo largo.

Fiscal a bisa Hues cu pa e aña aki lo no tin espacio mas. E ta mira cu na Januari 2014 lo tin espacio. Hues a muestra cu e ta kere cu lo por trata e caso den luna di December 2013. Despues di a evalua e agenda di casonan penal, a bin haya un buraco den December pa trata e caso aki.

Mama di e sospechoso a pidi Hues pa papia un rato. El a expresa cu ta duele masha hopi loke a sosode pero e ta pidi pa e mama di e victima respeta su yiu y no pone cosnan riba face book.

Hues a bisa e mama di e sospechoso cu e no por bay mete na e momento aki den e asunto aki.

E comentario di e mama di e sospechoso por poco a causa un decision cu e mayornan di e victima. Abogado mr. Griffith a sa di controla e situacion y evita un escalacion den sala di Corte. □